

四庫全書

史部

欽定四庫全書

史部

名蹟錄卷

三至六

詳校官監察御史臣劉芬

編修臣程嘉謨覆勘

總校官庶吉士臣倉聖脉

校對官學正臣常循

謄錄監生臣劉家瑛

欽定四庫全書

名蹟錄卷三

明 朱珪 編

墓表

宋龍洲先生劉公墓表

先生名過字改之廬陵人宋以詩俠名湖海間陳亮陸
游辛棄疾世稱人豪皆折氣岸與之交丞相周必大聞
其人欲客之門下不就故人潘友文宰崑山縣延致先
生先生雅志欲航海因抵縣留宿焉先生卒縣主簿趙

希楸以友丈所贖錢三十萬緡買地馬鞍山以葬遂立
祠東齋久而墓與祠俱廢更一百四十餘年為至正十
三年州人顧瑛秦約盧熊等聞之州州下其事徵諸圖
籍正其厲域表大石其上題曰宋龍洲先生劉公之墓
越六年寺僧盜葬其所今知州費侯復初令下僧遷骼
復其墓且表樹焉遣客殷奎謁予求表墓詞予昔往來
婁間屢詢其遺墓弗得今幸墓復予何辭於言或謂公
一窮詩流且其詩又局於季宋陋習僅如五季羅昭諫

爾何以表樹後人哉予曰不然取人以詞不若以節裁
公嘗抗疏光宗請過宮屢與時宰陳恢復方畧勇請甲
兵謂中原可一戰而取不用去正類昭諫力勸錢尚父
以春秋討賊之義義士為之激立可以詞客少之乎吾
以是復奎使歸告費侯刻石為表大元至正廿一年冬
十月五日奉訓大夫江西等處儒學提舉楊維禎撰將
仕郎杭州路海寧州判官褚真書

墓碣

元故朝請大夫温州路總管陳公墓碣銘

陳氏出舜後胡公滿以國為氏公之來裔莫詳譜牒世居崑者祖諱信亞中大夫同知浙東道宣慰司事輕車都尉追封潁川郡侯父諱允恭嘉議大夫平江路總管上輕車都尉追封潁川郡侯皆公推恩所覃也公儀表魁壘遇事沈密而果決其開誠下士則洞見肝膽平居好古健遊覽嘗不遠千里登泰山日觀南上武當絕頂觀銅柱東航海謁普陀大士像皆若有所遇至正五年

間詔下輸粟於邊者授官公以粟授於潛縣稅使遷晉
江陞牛田司丞十五年淮兵南下倖仕者相鳴而起皆
集詬亡賴公獨逃禍民伍越三年間走京都挾粟數萬
斛濟國餉大臣梯之見天子天子旌其義授宣武將軍
同知韶州路總管府事未行明年薦授朝請大夫溫州
路總管兼勸農防禦事又明年到郡郡方以民力捍城
飢死者相枕藉城下公下令發廩及私帑計丁雇役民
趨者如市城塹不日成前政督秋稅以家量收病民甚

公亟易之閱三月政平頌作秋九月遽以疾終二十二
年夏五月孫男經奉函骨航海歸是年八月十二日葬
於馬鞍山先塋之左公諱志學字俊卿娶顧氏蔣氏並
封潁川郡夫人子男三人長逢祥江陰州申港巡檢次
逢吉江浙行樞院都事逢原水軍都府萬戶孫男九人
孫女七人俱在穉逢祥衷衰來拜余門曰士附青雲屬
之王公大人而身後聲光著白不朽則必托一代之鉅
手筆先子幸附青雲有祿位不幸卒海邦數千里外不

能如禮葬乃子孫罪又不得鉅手筆如先生壽吾存沒
非重不幸歟幸哀而賜之銘予與公為甲庚友者二十
年辭不可遂為銘曰貴與富不兩完害金匱玉褐蓋棺
仁人富不以私補吾國漕賑我以歲飢要銀艾佩銅虎
爾兵爾農子聽父堡障立梁柱傾天不假以三年成孫
笄笄齒未丁護喪航海砥平玉之龍氣蔥蔥白鶴歸
來語長松城郭徙井邑改揚子作銘銘有在賜進士出
身奉訓大夫前江西等處儒學提舉楊維禎撰盧熊書

元故殷處士碣銘

至正廿二年九月癸卯朔十有八日庚申吳郡殷奎葬
其父雍逸處士之柩於崑山先塋之次既葬樹碣墓道
而請其師東維叟為之銘處士名庠字君序其先華亭
人居崑山者再世矣崑俗喜貸殖類蓄高貲遺子孫處
士哂曰貲多愚子孫且賈禍何用哉聖賢之學達可庇
民物窮亦善一身敕其子奎不遠數百里從予遊一州
皆笑以為迂處士不為變益市書築室使卒業予已喜

處士之志果確而奎亦謙厚雅飭刻意古學予於是又喜處士之願克有遂也始處士少時即以長子任家督弗及於學然其天質之美孝友忠信自有絕人者既壯間觀古書傳求其人行事施諸家父性嚴處士事之竭力能得其歡心遇子弟恩意篤至周人急無所吝雖負之不校其葬親勿襲夷鬼俗委水火君子稱之故其歿也人多哭之哀處士享年五十有七士君子誄其行者私謚之曰雍逸處士曾祖萬采嘉興節制幹官王父澂

父子湮皆抱德不仕娶王氏宣政院宣使忠仁女子四
人女二人孫男六人奎其冢子也殷氏三世有德而無
祿四世而昌意其在奎乎乃為之銘以俟銘曰生不穀
死不壽德則富惟其不有以遺後會稽楊維禎撰豐城
余詮書彭城錢達篆額至正廿三年十一月九日甲戌
男奎璧箕亢等立

元故曹母碣銘

維曹元達庶母吳年五十二歲喪於賊而不得斂將窆

墓納棺衣而葬焉乞銘於其友昆陽鄭東曰幸不沒母
善且使後世不為虛墓也於乎元達之志可悲也已母
諱某家世業農居徽之休寧金竹村母幼鞠於嫡外家
汪氏年十五從嫡歸於曹先生某先生卒母哭之喪明
時年二十有八至正十一年賊發汝潁南延江東饒徽
間初賊逼徽境上家人欲負母出母曰君宜盡引去先
人木主不可无守也且賊亦人耳顧我盲廢人何忍殺
吾果幸得免十二年正月十七日賊又卒至家人倉皇

四出賊以刃臨母曰能盡出篋藏可无死也母曰吾家世業儒弟存先人敝廬及多書耳餘无有也賊怒竟殺母及其孫國賓親戚童婢同時死者三十三人賊退家人歸求遺屍衆骨橫地莫辨其為母矣初母從嫡于曹能任治婦事而嫡不勞性不喜浮飾每服布綈猶以為過曹先生卒其兄欲奪嫁之母指天日自誓無他生子二人曰天德宜德天德即元達也時皆尚幼今其能讀書自立為世儒皆素教之力也天德娶孫氏生子二

人曰泰安普安女二人宜德出贅孫氏生子一人曰關
住女五人又曰奎德者天德之兄嫡汪所出也生子二
人曰國寶國定元達及冠時貧無以養負奇氣裹糧吳
楚之間從時名貴人遊時客高郵間賊陷饒徽甚危急
亟至杭遇阻不得往江淮反覆計之乃詣太官請身為
士卒由行間以往太官見天德狀魁岸且出言甚丈疑
其為間諜將殺之會有識元達者得救免由是竟不得
歸明年賊破徽家殘母已亡於乎命也夫銘曰天高高

勿可求降淑媛覆用仇竟死變子莫收糴衣冠垂千秋
於乎是為曹母之丘昆陽鄭東造濮陽吳睿書

故孺人陶氏碣銘

孺人諱安垕姓陶氏世為蘇州人宋奉議郎諱璫之曾
孫登仕郎諱伯桷之孫封從仕郎太平路繁昌縣君諱
愈之仲女曾祖妣朱氏祖妣張氏妣宜人張氏也孺人
生於至元十九年六月丁巳年二十有四而為辰州路
儒學正同郡錢君良傳之配端重有威識勤不妄用奉

舅姑以禮承其夫以順訓飭子女以嚴事上撫下悉有
章序晚年好誦佛書預為送終之具纖悉畢備故其內
外宗姻莫不稱其能洪武二年正月辛酉卒于崑山仲
子述之家享年八十有八子男二人曰通曰述女一人
曰惠柔適醫學提舉張元善孫男六人晉益復升觀恒
女六人淑安淑賢淑惠淑貞壻曰嚴元裕徐天德周文
瑩張天瑞淑能淑仁未嫁曾孫男七人女一人是年三
月丁酉祔于吳縣靈巖鄉黃山徐湮先塋學正君之墓

至是學正君之亡已有三年矣學正君之猶子遠銘其壙石曰九十其壽康且年也有子有孫孫多曾也善積于身垂後昆也有信不信眎茲刻文也錢遠撰并書

壙志

元故希古道人朱公壙志

先考諱旭姓朱氏字子陽號次山一號希古道人世居揚州崇明之西沙里至元丁亥遷于吳郡崑山之太倉曾祖諱禮妣陳氏祖諱智妣章氏陳氏考諱文清資德

大夫大司農河南江北等處行中書省左丞妣郝氏先
考性簡重識量宏遠孝以事親順以事長教子孫以義及
鄉黨以惠處富貴淡如也大父左丞公以忠勇之姿委
質戮力於宋革命之時首創海運勲業著于朝時大臣
知先考之才聞于上至元癸巳降金符授忠顯校尉海
道運糧千戶蒞官以公正上嘉其能賜以金緞秩滿不
樂仕進退居田里構園池樹藝花竹匾其室曰樂善日
與賢士大夫游鄉人死无殮者則買棺瘞之貧无以禦

寒暑者則製帳并綿續施之大德辛丑秋七月風潮西
沙飄蕩民廬死者八九而存者无以舉火先考運米千
石往濟之有田數十頃歲少稔勿入其租吳郡三皇廟
及玄妙觀鐘樓圯于風雨作而新之其樂施類如此先
考性好學素尚儒雅博涉經史尤長于小楷篆隸章草
早歲從趙文敏公遊已有能書稱晚年深造晉唐筆法
之妙家藏法書名畫古器皆神品至正元年辛巳八月
二日丁未以疾卒于家屬續不亂惟戒子孫曰吾死勿

狗流俗用浮屠法惟事葬祭之禮足矣言訖而逝於乎
痛哉先考生於至元十五年戊寅九月九日享年六十
有四娶同郡虞氏子男四人長曰明德娶顧氏次曰明
善有疾未娶次曰希賢贅平氏次曰明達贅虞氏明德
明善虞出也女四人孫男四人長曰拜布哈從仕郎婺
州路蘭谿州判官次曰兼善曰善慶曰觀善孫女十一
人曾孫女三人明德等忍死以是年九月八日癸丑葬
于崑山賈岡原先塋之次日薄事嚴未暇干銘當世大

手筆姑叙歲月納諸壙云孫子朱明德等泣血百拜謹
志朝列大夫平江路崑山州知州兼勸農事孟鼐瑪岱
填諱

故處士呂府君壙志

先君諱德茂字茂卿世系自西岳得姓至東萊伯恭氏
之後為吳人永嘉李五峰先生嘗為文序其譜曾祖考
諱餘慶流祖蘊而未發父端號松岩初試崑山掾及授
汲梁稻田提舉生先君女子五人先君年十四喪親獨

養于母讀書習吏事不煩責教強志自立先世富有藏積時宋氏李氏姊妹長先君固讓獨取書數百卷曰是遺子孫足矣姊妹遺諸孤擇師教之資其嫁娶喪死恤其家勿替父母喪哀痛而不踰禮人益稱之皇慶二年徙州家婁水上田壤益以廣俄燬于災堂宇深斥大之尤為宏遠事母終始致孝好施予為友為義緩急叩門如取水火歲大疫鄉鄰有至親不往過者先君軫其寒飢家至戶到多所全活晚年恬無仕進意常訓諸子曰吾

少孤奮勵成家又有賦役日夜竭吾心思勞吾躬而至
于斯歲廩之入可以供祭祀燕賓客鄉里之老南閭北
閭杖履可往來也若等服習文學學所以敬親親賢之
道吾宗為不墜矣於乎痛哉至正乙酉三月病痿痺疾
凡禱祀醫餌不驗其年十一月一日終于家年五十三
配唐氏子男五人曰誠次本文已娶恭尚幼長女年若
干先卒壻茅世顯庶子信女某誠娶邵氏無子早喪孫
男二人又明年丁亥十月十七日葬惠安鄉古塘北岡

之原遂遷祖松岩君祖妣楊為昭穆相向以冢婦張氏祔誠負大不孝未獲寸祿以養越二年不克葬葬且事嚴未暇乞銘于當代儒先含哀忍死述其大者納諸壙孤子誠泣血百拜謹志前進士承事郎台州路天台縣尹兼勸農事楊維禎填諱袁華書

元故雲濤處士濮陽吳君壙志

先人諱睿字孟思姓吳氏其先世為開封人六世祖諱忠宋宣和間充殿前司統制官扈從高宗南渡遂居于

杭高祖諱永昌左武大夫忠州防禦使曾大父諱佐宋
承信郎充御前東庫使臣大父諱清宋成忠郎充殿前
都指揮使帥僉父諱埴宋德祐初以京官子弟恩例授
迪功郎時年十四越歲餘宋主內附拘集近世子姪入
都先祖亦在其列留都下凡十年至元間迴錢塘遂无
意進取唯耽嗜法書古刻以自娛暮年號養素處士先
祖生于宋景定辛酉歲五月七日以有元至正九年己
丑歲十二月二日考終得年八十有九祖妣王氏先卒

二十有六年得年五十有一同以至正十年庚寅歲二月十六日卜葬于湖州武康縣封禺山之原先祖凡有三男子而先人居長焉先人娶新城徐氏子至順二年壬申歲四月廿八日卒年三十有九先人自幼雅尚古文篆籀之學凡六書原委靡不究探志樂山水清幽嘗自號為雲濤散人不幸以至正十五年三月廿三日以疾卒于崑山之寓舍於乎痛哉先生生于大德戊戌歲五月三日丑時至是得年五十有八子男一人名昭以

是年四月二十八日甲申歸葬于武康縣封禺山祖塋
之原於乎痛哉日薄未能乞銘于當代立言君子以傳
不朽姑撫卒葬歲月納諸幽室孤哀子昭泣血謹志友
生薊丘楊中填諱

元故處士易府君壙志

府君諱思義字宜中其先吉安廬陵人祖諱斗元宋咸
淳進士迪功郎平江路常熟縣尉攝警覬山遂家焉父
諱偉皇朝從仕郎吉安路吉水州判官致仕母李氏府

君孝慈溫恭出乎天性隱德勿耀恬然終身生于至元
己丑十月十二日歿于至正癸卯正月十二日以是月
十七日戊午祔葬于馬鞍山先塋之側娶同郡長洲王
洪女先府君七年卒子男五人鼎恒皆王氏出闕孫徙
孫葬孫闕徙孫皆早世女一人適王懋功孫男二人女
四人葬有日孤子鼎忍死泣血書梗槩納諸壙豫童陳
增填諱

故宜人李氏壙志

宜人諱貞順字巽卿姓李氏居吳之崑山大泗里世為
上族乙亥冬天兵南下家牒遺逸故曾大父大父諱官
無所考父興龍字漢卿號慤齋宋太學生也會我父以
江西戊辰進士尉常熟秩滿攝警言崑山歸順事定先妣
以疾殂得地于馬鞍山西葬而家焉慤齋與先人善幼
年以君許嫁於我庚辰五月先人以疾卒合葬先妣墓
至元甲辰冬而翁不渝初言克合二姓君初歸我嘗以
不及奉舅姑為憾至是供祭祀睦宗姻撫諸子克勤儉

莫不盡禮天性然也至大己酉夏吳之文學始以我備
儒吏貢于郡旋調嘉禾陞浙淮鹺臺至江淮府史南省
三擢州縣幕官皆及代乃被台州臨門巡檢之命在官
未久年至申請授從仕郎吉安路吉水州判官致仕恩
例封君宜人首尾宦遊三十六年清苦自持生事益艱
日贍數百指得不困乏皆君助也暮年築室崑山以便
拜掃戊子春季子好禮為毘陵郡吏明年奉親就養不
逾歲君忽嬰疾五日而卒寔庚寅二月二十七日壬子

也生于宋咸淳庚午六月二十七日乙未享年八十有
一子男五體仁思義好禮近智履信以時擇配非苟女
二長適嘉禾王蘭孫次贅湖南帥掾四明陳秀民内外
嫡庶孫男十九女十一曾孫男三女五人於乎吾與君
共處六十五年賓對若一日目見四世又將有婚嫁者
復何恨焉所恨君之亡也先一夕飲食談笑如常日黎
明乃疾疾即篤緒言遺念皆不及矣伉儷之情悼痛之
懷其能既乎乃率諸子扶柩歸崑山卜以是年六月十

三日丙申祔葬于先塋之麓夫易偉因述梗槩內諸墳
幽文正公八世孫將仕佐郎平江路儒學教授范文英
填諱

故從仕郎吉水州判官易府君壙志

府君諱偉字成大號兼山先世長沙瀏陽人遠祖雄東
晉舉孝廉為春陵令死王敦之難及五代子孫遷廬陵
五世從祖祓貴顯趙宋世由太學釋褐累仕至禮部尚
書高祖嘉謨靜江府司戶曾祖應云知靜江府義寧縣

父斗元平江常熟尉皆以科第進尉秩滿攝崑山天朝
革命就家焉府君幼失怙恃負氣積學卓以成立既強
仕困于無資援不能自致乃嘆曰凡可以有為則為之
即試吏平江再調嘉興陞浙運泉台州臨門巡檢年及
致仕即任告老陞從仕郎吉安路吉水州判官致仕居
閒置散惟早暮以禮法繩子孫以論議商古今接親友
諧以言笑理情性作為歌詩仕不剛撓退乃順居如是
而已府君生宋咸淳丁卯三月二十有九日歿今至正

十四年甲午六月十一日是日命子孫來前語之曰吾
以考終奚憾焉汝子若孫克率常訓吾死且安逝矣遂
卒年八十有八其年六月廿四日葬崑山馬鞍山西合
封宜人李氏墓距縣尉君墓五步府君娶崑山大泗里
宋太學生慤齋李公之女先府君五年卒子男五人體
仁思義好禮近智履信女二人長適嘉禾王蘭孫次贅
慶元陳秀民掾湖南帥府為之内外孫男二十人女十
一人曾孫男四人女四人將封諸孤泣血謀曰府君修

德勤事孰敢泯隆當乞銘昭代縉紳以著其實謹述大
槩納諸斧屋大中大夫前海北廣東道肅政廉訪使陳
允文填諱

故青村場典史沈公壙志

先考諱仲字長卿姓沈氏梅谿自號也世居越之餘姚
龍泉鄉祖考諱_叔祖諱震字東南妣王氏先考剛直好
義不妄交家貧乃謀升斗之祿以養由巡司鹽場縣吏
後奉浙江省檄陞吏平江府又調杭州考滿授松江六

日享年三十八二十四年甲辰夏六月廿八日孟骨葬
于馬鞍山文筆峰下先塋中之右先考娶崔氏瞿氏子
男五人長樞一十四歲先以治命定婚嘉定大塲東陽
沈氏次機綱常瑞子女三人長妙賢九歲先以治命許
適崑山沛國朱氏次妙德安安孤子樞泣血謹志博陵
林龍填諱

元故海道千戶曹君壙志

先考諱珪字德璋姓曹氏海虞人海道都漕運副萬戶

諱南金之孫贈奉訓大夫徽州路婺源州知州諱文華之子生而穎異早喪父自能奮立襲大父恩授忠翊校尉海道香糯所千戶佩金符在官二十年部餉航海者凡八上至正乙未以漕事如京適罹兵亂遇寇北通州不屈而死時至正己亥二月十五日也即藁葬于州北水涵寺之側若干步年五十一有男三人長玄次立次亨女四人孫男一人曰遷女一人嗚呼世路巖巖玄等負罪未能奉其骨以歸瘞姑鑿窵於虞山新塋以俟時

寧哀哉至正二十六年龍集丙午夏四月孝子玄等泣
血百拜謹志傳齔填諱

元故徐氏孺人壙銘

徐氏諱永貞常熟人父諱元震母陸氏為同里曹玄妻
卒于至正十九年九月廿一日年三十歲子男一人曰
遷女一人曰幼華至正廿六年四月廿一日自虞山之
右遷葬于山之陰其夫為之銘曰前汝姑後汝娣從之
居即庭內至正丙午夏四月志

名蹟錄卷三

欽定四庫全書

名蹟錄卷四

明 朱珪 編

墓志銘

楊履齋先生墓志銘

先生諱天澤字履齋號守愚子其先汲人始祖扈宋高
宗南渡遂居吳之嘉定楊巷里始末嘗有名其族人
蕃大人以名焉世為儒間有出仕至牧伯者至先生以
文行聞於人其里姓益著曾祖諱椿年祖諱文炳皆隱

德勿見父諱貴龍入老氏法中為道士性純孝父嘗疾病禱于上下勤至請以身代因而有瘳人以田來賣惻然語之曰汝獨無父母妻子耶田賣何活乃發廩賑之其人田卒不賣至今為富人妣盛氏正以從夫義以慈子人謂先生賢自父母賢也先生寬弘爽易不肯發人過人有小善稱之不置口又甚好客每客至則樂客多愈樂不至則不樂也客賢無遠近識不識雖躡屣踵門過之一以禮貌弗為等級有不賢雖僕馬甚盛未嘗一見

焉故客在先生之門必賢也嘗闢廣堂置鉅樓可市坐
數十人日就與客會飲食客食必肉妻子則蔬也察客
有寒色則解裘衣之故客在先生之門無寒飢也及卒
之日客無貴賤聞之會哭于其家盡哀而去人往往歎
曰惜哉使先生有位其待士如此有不為之用耶有不
樹功業垂休光于萬世耶惜哉其鄉有告以衣食嫁娶
死葬勿具疾病不能醫者先生咸賑恤之盡其鄉無有
凍餒天閼露暴及男女過時者甲致乙於訟先生陰為

召甲賂之事既解乙勿知也後造門謝先生辭之曰告者妄耳終不以德乙也客有携其子來其身寒露先生顧謂其幼子曰此兒可憐其幼子即解衣與之先生喜曰真吾子哉其賤人率此類讀老氏書喜其言遂入其法度地立老子像至羣書無不通悉以資為詩然為詩直以見志不為深刻且喜飲酒旦從人飲酒至暮未嘗亂或歲時擇勝地集賓客為樂曰人壽會有盡身毋自苦也至元丙子正月己酉以痰疾卒後十有三日庚申

葬于所居北半里先人之兆配顧氏生女二人初以無子以徐氏子為後曰希祖次娶宋氏生男五人長曰希道娶徐氏次希賢即幼時能解衣與人者也次希遠同希賢為道士次希真娶謝氏希傳娶嚴氏女一人孫十有二人東始踰冠時識先生先生將五十矣不以年倍余長而以為友今老矣銘先生之墓奚辭銘曰可為勿為維有命勿以名殊維考行元位與爵德則盛斥餘賤之斯亦政古聞提髮且獨聖彼氓教怠卒以病我誠悅

金粟道人墓志銘
士士乃應應維其賢翼以正名聲播流實則稱史雖弗
登維論定丙子之歲日月令父尊子卑二穴並綿綿其
垂罔終竟後之觀者視楊姓昆陽鄭東撰

金粟道人顧君墓志銘

金粟道人姓顧名德輝一名阿瑛字仲瑛世居吳譜傳
野王裔未必然否也大父以上皆宋衣冠大父任皇元
為衛輝懷孟路總管始居岷山之朱塘里父玉山處士
隱德不仕在養子幼喜讀書年十六幹父之蠱而遂廢

學焉性結客常乘肥衣輕馳遂於少年之場故達官時
貴靡不交識然不墜于家聲三十而棄所習復讀舊書
日與文人儒士為詩酒友又頗鑒古玩好年踰四十田
業悉付子壻于舊第之西偏壘石為小山築草堂于其
址左右亭館若干所傍植雜花木以梧竹相映帶總名
之為玉山佳處詩有玉山倡和等集行于世不學干祿
欲謝塵事投老于林泉而未能果先是浙東帥府以茂
異辟為會稽儒學教諭趣官者至則趨而避之至正九

年江浙省以海寓不寧又辟貳崑山事辭不獲已乃以
姪良佐氏任焉又五年水軍都府以布衣起佐治軍務
受知董侯博霄時侯以江浙參政除水軍副都萬戶開
府于婁上又一年都萬戶納琳哈喇公復俾督守西關
繼委審賑民飢公嘉予有方即舉知是州事朝廷使者
銜宣見迫且欲入粟汎舟釣于吳淞江丙申歲兵入草
堂奉母挈累寓吳興之商溪母喪于斯會葬者以萬計
是歲玉骨歸瘞于綽墩故壠當時交相薦舉乃祝髮廬

墓閼大藏經以報母恩復鑿土營壽藏于山之陽環植
叢桂扁曰金粟自題春帖云三生已悟身如寄一死須
教子便埋蓋人傳前身是慧聚寺比丘延福又夢中知
向一世為黃冠師姚興孫者是也金粟道人由是而名
道人娶王氏生男元臣宣授武畧將軍水軍寧海所正
千戶今陞水軍都府副都萬戶未任生女妙福贅陸琦
次子元禮今授正千戶總鄉民守本土元貴習舉子業
未冠某在幼一人女二人皆庶孫男二人孫女四人予

嘗慕趙岐了身後事趙加勅子刻石墓前皆生而達者
吁當今兵革四起白骨成丘家無餘糧野有餓莩雖欲
保首領以歿未知天定如何耳今年四十有九且有鵬
鳥入室恐傾逝倉卒中則泯滅無聞且欲戒後之子孫
以苧衣桐帽屨鞋布襪纏裹入金粟塚中慎勿加飾金
寶致為身累故先自志并為之銘曰大生之有歸猶會
之有離譬彼朝露日出則晞予生也于生弗光予死也
於予何傷願言茲宅永矣其藏大元至正戊戌五月廿

九日顧阿瑛自製并書汝陽袁華篆額

故王子厚墓志銘

子厚諱世淳姓王氏蘇州崑山人大父珪父忠義母魏氏子厚生平孝友以親老試吏為州書佐遇事簡直遭時多故念吏不堪為夙夜感歎遂以洪武元年四月乙丑自沈婁江而死春秋四十有八娶金氏子男二人曰謙曰復女二人壻曰歸德曰全濟男女四人其父以五月丙申藏其骨于馬鞍山之東岡嗚呼悲夫銘曰嗟嗟

子厚離世氛兮發憤捐生從靈均兮返骨山岡償夙願
兮陵谷變遷尚永安兮范陽盧熊撰

元故處士陳君墓志銘

至正十三年癸巳歲五月十一日崑山處士陳仁甫卒
明年七月某日葬于古塘北一里岡身之原先是其子
允謙以永嘉黃凱狀來乞銘處士諱仁壽字仁甫初姓
陸氏陳無子以處士為後陳始居馬鞍山之陽其地曰
東城頭宋末因兵譖牒散亡其先世皆不可攷延祐間

州遷婁江處士以州遷地氣消散乃以擇地新州北鹽
鐵塘東居焉父諱亨有才諳沈晦不肯仕處士和易損
抑圭銳剗盡未嘗使氣忤物或暴逆相加則談笑解之
鄉里稱其長者且素儉制錙累銖積乃至饒給暑寒裘
葛雖至敝裂不肯厭棄至于施予則无少留吝飲食適
口即止不求甘肥室廬卑隘或勸其易以閭鉅處士曰
第免旁風上雨斯亦足矣苟或過侈將何以為子孫法
耶然四時接親好待賓客為美酒嘉肴必極豐備見富

人多田往往桀驁虐農而過倍取入至其子若孫有不能保者皆是也常戒諸子曰吾幸有薄田可給衣食苟取倍自益亦止自損耳今其諸子皆賢守遺訓也世壽六十有二配王氏生子四人曰允謙允讓允恭允敬允謙娶王氏生子三人長曰睿次智次孝孫女一人允讓娶岳氏生一子曰聰女三人允恭娶余氏生子一人曰聖安女三人允敬進義副尉平江等處水軍萬戶都府百戶佩銀符娶王氏生子三人曰明曰德安女一人處

士獨以為善稱于鄉使其人之為不善者聞之亦可以少媿矣雖其享年不及獨其子孫衆盛若此將必有顯大其家者尚謂天道之不可信耶銘曰麟也有定貌也為羣黑由白分厲以媿分爰視其家亦既孔敦彼由培厚我實用勤維彼昏人愚何可云謂天實高弗予聽聞顧獨斯人厥肩如雲其報曷已川流沄沄閱千百祀永徵斯文

章母墓志銘

章母諱妙觀吳郡張氏之女也其家乘亡逸世系不可攷母生而了慧父母愛之過于丈夫子當行為選佳壻歸于崑山章處士天祐處士沈厚果毅才可用于世獨不肯仕初家未甚裕自母歸克相于內由是日以豐大處士欲為一善母必勸之果往往捐餘賑乏惠及疏戚甚衆故其鄉稱處士之善者必及章母焉母性慈厚至御下婢亦嘗貸以色雖甚忤意罵詈之聲不出口子使就學常戒其母嬉笑今子麟讀書甚賢人稱處士善教

亦必及於母今其鄉之為人婦與母者取章母為法焉
至正十三年歲癸巳八月六日巳丑以疾卒明年四月
十有七日巳酉葬于州西惡安鄉致和塘北先塋之左
處士先母四年卒至是始同葬焉世壽七十有七生子
一人即麟是也娶張氏名淑貞庶女一人曰德慧適同
州朱德賢孫三嫡長曰禧次庶聖保佛住麟嘗從永嘉
鄭東遊拜且泣曰麟葬母有日願先生有以銘銘曰爰
有家家孔嬴相夫子宏厥聲訓子麟竟有成用刻銘詒

于後昭茲往式視章母

故處士夷孝先生盧君墓志銘

先生諱觀字彥建其先龍興武寧人五世祖來平江遂
占籍吳縣曾祖諱仁仲字和父祖諱銘字明叔工詞賦
鄉舉待補進士考諱有常字元吉以隱約終妣呂氏先
生少刻志于學嘗受業于鄉先生湯公彌昌錢公重鼎
之門既卒業客遊江淮間名卿鉅人有欲舉先生出仕
者力辭之隱居教授接人勿以貴賤異或加以非禮先

生恬然不與校曲直遇人喪葬患難雖力不能贍亦必
為之盡心經畫其事親溫清滌滌不以貧故或少闕暮
年抱羸疾猶手不釋卷吟哦諷誦咀嚙道真益勉飭其
子孫以讀書修行會母卒先生不能行喪禮痛慕悲號
病日增劇遂以至正二十二年冬十月庚辰卒得年六
十五歲娶同郡王氏子男二人曰熊曰熙女照適清河
傅軒孫男二人彭祖充賴孫女一人曰織熊痛惟先生
生不能力學以厚養歿不能顯光幽潛請于門人弟子

私謚曰夷孝先生即先生歿後之十有八日葬于長洲
縣武丘鄉先塋之左其友人陳留申屠衡為之銘其詞
曰是為夷孝先生之宅依其先隴之側惟詩書世澤亘
百世而弗忒者噫彭城錢達篆蓋

元故遷善先生郭君墓志銘

先生諱翼字義仲世崑山右族考友諒為大賈獨善教
子妣陸氏先生自少入鄉校從衛培學培故宋參政涇
諸孫博學篤行亟稱先生穎悟深加器重先生既壯益

肆力于學沈潛百家尤邃于易年四十閉門授徒嘗著
其受業之室曰遷善曰以識吾過也鄉人亦為名校南
之梁曰遷善曰是吾郭君之所居也先生為文詞必追
古作者諷誦思繹雖一字不苟省也其于一時文人少
所許予獨稱永嘉李君孝光及天台丁公復所為詩李
公亦謂先生之詩佳處與人不同調會稽楊公維禎每
以其言為題先生與俗寡合有力者多不肯薦引竟以
訓導老于學官由是家益窮守益堅攻苦食淡讀書自

若也嘗自號東郭生又自稱曰野翁所著文集曰林外
野言凡若干卷病且革知州高昌傑侯率州人士治其
葬事以至正二十四年七月廿三日卒年六十以是月
某日窆于馬鞍山北之中峯因題曰還善先生郭君之
墓妻胡氏長子夔皆先卒次子疇女壻汪思齊陸彛孫
男長壽嗚呼先生之生也連蹇不諧于時其歿也貧无
以為葬亦可哀已先生嘗謂熊曰吾死汝為銘銘曰嗚
呼有為而不遂于施而卒至于斯吁其可悲吁其可悲

范陽盧熊撰并書吳郡王時篆蓋

元故靖夷先生顧君墓志銘

先生姓顧氏諱權字伯衡世居徽之婺源其父達卿始
入吳因占籍崑山娶婦生子為崑山人初達卿與雲峯
胡先生同里閉心敬慕之期有子當使為士及先生既
生見其凝重岐嶷益自喜銳意教督之先生稍長能觀
父之志敏力學業不以祁寒盛暑有少輟既壯博習羣
書尤究心于易教授里中子弟多從之遊時人莫不善

其父之能教也先生為人
不事矜飾喜哦詩飲酒常
頽然自放然其交際恭遜
久益謹蓋未始忤也中歲
刻意為文章有古作者矩
度雖一字小疵不為苟且
其志亦欲以是少見于世
者遭時喪亂竟窮无所就
以死年不滿五十無子昆
弟族人為主後嗚呼天乎
先生乃命之如此悲夫先
生娶呂氏生子輒夭死買
妾得一女尚幼其卒以至
正廿四年九月丁亥其葬
以十一月丙寅其墓在馬
鞍山之北麓其葬事知州
侯斯教授蔡君基

之所具也葬有期日其故舊門人咸痛其有德无後相與私謚之曰靖夷先生而奎與為銘也銘曰善不必有後仁不必有壽彼夢夢兮誰則能究言甚文兮行甚懋嗚呼先生為我能為兮苟在我其奚咎

故朱徵士墓志銘

徵士諱玉字君璧姓朱氏先世自江西來吳今為崑山人祖已上譜逸考諱玄妣秦氏徵士幼穎異生十二年遭外艱能厲志樹立既長喜繪事聞佳山水每脩然獨

往數十里不以為難永嘉王振鵬在仁皇朝以畋畫稱
旨拜官顯榮徵士從之遊盡其伎王君亟稱許之至順
庚午中奉中宮教金圖藏經佛像引首以進方不盈矩
備極其狀而意度橫生不束于繩墨人言王君益不之
過云至正十有五年清寧殿成敕畫史圖其壁吳興趙
雍以徵士輩二人聞使使召之家道阻弗果上徵士亦
既老矣偃蹇一室以圖史自娛楊維禎先生所為記虹
月樓也徵士行內修平居言貌循循薄于利欲身且老

猶精謹如壯者廿五年十一月十一日卒春秋七十有三娶諸氏又娶支氏子男二人長曰佑賢其幼務德蚤亡女一人適許氏孫男三曰翬翬妻孫女一曾孫男一曰寧孫女一明年月日葬其州卜山之西原子聞界畫家王士元郭忠恕為首冠偁高下一守矩度而王君吮筆為之曲折層疊自如度越古人矣徵士得其傳是可銘也銘曰名藝之成太平之澤貽爾子孫尚引勿替華亭殷奎撰武寧盧熊書

故處士傅君墓志銘

處士諱翼字仲翔平江崑山人父榮母王氏處士少孤
苦既壯業吏事猶不免貧窶其為生甚艱然其志不以
是而亟貨利也有一子則使為儒者其所以教飭之甚
力曰士而貧何有于阜之富也今其子學成遂為儒家
處士素直義見人善為之喜躍如在己見為非者眾督
過之而不為背憎貸人財度不能償即毀券弗少吝遇
親友飭詞矯貌簡如也春秋六十有一至正廿六年丙

午歲十月八日卒娶周氏再娶劉氏張氏皆先卒子男
料長女嫁沈源次女嫁陸厚皆周出也孫男杠招孫女
杼軸以其月十五日葬其柩馬鞍山陰之中峯處士嘗
手寫孔孟四表遺令內壙中銘曰艱于生勿徇世以失
渝其子以學去吏而儒今既償其志又將焉求華亭殷
奎撰武寧盧熊書并篆蓋

盧府君妻王夫人墓志銘

夫人諱蕙字靚之平江崑山人祖諱國器父諱慶詢母

范氏慶詢子女五人而夫人最長得早承家教誦詩識
字縫紉烹飪皆精善年廿三為同郡盧府君諱觀之妻
禮頌端肅不妄言笑不輕出屏幃甚為姑嫜所重府君
孝友能貧夫人相之維謹其訓子女弗加笞責而悉能
有成待妾御未嘗訶叱鄉閭稱頌為楷法府君老且病
夫人經年不解帶府君歿後其子熊以祿仕迎養郡中
既而平江被兵夫人居園城中憂悸成疾嬰城之日熊
被創甚例遣上道幼子熙自崑山來奉夫人歸里會關

法不出婦人仍主於滕君德進滕婦方視夫人如尊嫂
親為調護吳元年冬十月夫人疾革日在辛酉遂卒年
六十三貧無以為斂滕君復命諸子經紀其事親故亦
多往賻者熙始得葬夫人柩于長洲縣武丘鄉去閭門
五里初府君之葬熊為夫人豫作壽藏兵後他家悉發
而府君墓獨無恙至是竟合祔焉豈先德之厚陰有以
相之抑夫人平昔為善之報固如是耶熊博學有才諳
熙亦好修篤行女照嫁士人傳軒孫男三人孫女二人

熊既乞銘于曹氏以奎嘗教授府君有契家之誼復俾
為序云其銘曰有子而仕繫親之喜昌養之弗終覆養
以死孰衛其藏弗毀于兵今祔于此尚慰而子華亭殷
奎製序譙郡曹昌銘豐城余詮書彭城錢達篆額

孫君墓志銘

君諱元吉字吉卿姓孫氏其族本出富春平江崑山人
譜牒散落不可考次祖諱凱父諱淵妣賀氏君少為吏
雅有幹局持心平恕不肯屈法市恩至于排難解紛誼

所當為即奮然不顧利害年四十便棄去歲計田租所
入祭祀衣食之餘日置酒以待賓客遇賢者至即聽其
講論文義令子孫列侍觀其進益間有博奕絲竹之娛
方術藝能之士招與款洽亦不屑也晚年築室城南水
上署曰瓢窩角巾野服逍遙林下人稱為瓢窩道人別
號叻翁重罹變故憂憤形于顏色俯仰徬徨若無所容
于世尋自刎死年六十有二洪武元年戊申歲正月晦
日也配邵氏有子三人長曰文德次圭次基孫男五人

某某

缺

文德等葬君於馬鞍山陰之原君于予為

先輩君死時予羈客江寧聞問為之痛悼及還里中文
德以狀乞銘其壙予既為志其詞曰霧霾濛濛兮風猋
怒之太行嶮巖兮荆榛莽之待斯人之獨閔兮慘煩惓
其誰語宵耿耿之不寐兮辰咄咄之無語冒溫蠖吾弗
能兮孰臭惡之能處與其偪以偷生兮茫茫絕吭而逝
兮孰遺塵乎西山之餓殍已矣乎眾貪婪以苟活兮予
獨抗志而莫奪憤世以陋俗兮殺身以殉潔以死為樂

兮謂生可厭豈所欲之有在今孰云蒙懂而非達嗚呼
哀哉作善離凶兮不究于年是曰遭命兮非子之愆縱
細人之倖兮吾子之安重泉有知兮慰以斯文吁嗟千
載兮視此石存

故劉府君妻盧氏墓志銘

吳郡盧熊祖妣呂氏之卒葬于崑山縣西北馬鞍山後
初熊之姑名柔正者實彭城劉府君諱珍之妻也府君
有子輒天年望五十而歿兩女皆已嫁為士人妻姑年

始四十復撫其孤女三人依熊之父居焉其後熊父為
擇周英徐玄為壻英養于家英妻卒復以季女歸之姑
歲時往來哭熊祖妣焉哭熊之父焉哭熊之母焉而姑
亦老矣洪武建元戊申熊自江寧奔母喪還未期而姑
遂卒焉嗚呼其可悲也矣劉府君葬吳縣高景山今既
不克祔葬遂奉其柩葬于呂氏墓次今年庚戌始勒石
為志而俾熊書之熊之曾祖鑑宋平江府待補進士祖
有常隱居不仕其先龍興武寧人也銘曰盧女劉婦字

幼禎家世儒者耀厥聲弦琴誦詩壺範成相夫祀事致
潔清孝慈婉順播德馨嫠居廿載難成生撫育外孫惠
均平世壽六十有四齡屠維作噩居朱明下從慈母歸
冥冥中峯之藏維永寧

故俞府君墓志銘

崑山俞府君以洪武三年故月十有七日卒年七十其
月二十五日葬于縣城南積善鄉先塋之次其諸孤致
詞友人盧熊曰先君葬有日敢請銘按狀君諱謙字謙

甫早有志操既長能樹立習法律為吏性剛直臨事奮身不顧利害人有善取為已師不善疾之如仇面折人過失不少貸其奉親事兄一以孝敬濟窮恤孤意亦周至衆由此稱之年望五十即退休于家曰吾衣食粗給苟伏臘之計不遺以悅吾親斯人子之志矣矧敢妄求耶遂卜室南闔外屏絕人事以產業畀諸子人益賢之會有誣君幼子嘗隸軍籍牽連者十餘人悉送兵部君亟走訴中書咸得釋以歸未幾君又以事至京師遽病

寒急返比至家三日而歿君之先蓋杭之臨安人父洪
為平江路驛史始家崑山今為崑山人君娶陳氏子四
人思敬思聰思義思誠孫男二人鑑鏞女四人初君未
有子熊先祖玄吉父謂之曰君孝慈方直立心不欺天
將畀之多男子矣今諸子皆賢孫息蕃茂天之報施善
人豈不信夫銘曰志皦皦兮烈秋霜譽洋洋兮著鄉邦
有子孫兮而熾昌猗作善兮有餘慶尚不朽兮視銘章
范陽盧熊撰

周府君墓志

府君諱允升字吉卿姓周氏其先常州晉陵人七世祖世德宋南渡時始遷平江之崑山居焉曾祖天驥娶盛氏祖津娶袁氏治詞賦端平元年嘉熙四年鄉試兩舉待補進士性介直好施與貧者資以粥藥棺槨作輿梁浚井渠悉無所吝嘗割股救父疾或以義責之曰父母遺體宜宜毀傷然因所予者還以奉之詎為過耶竟以高壽終父大任元建德路壽昌縣儒學教諭自號好山

居士居士先娶葉氏生男二女一再娶陳氏生府君及
三男一女府君家世為儒而以醫術名於鄉邑能謹飭
勤儉不妄交遊兢兢守業不墜以疾卒於洪武三年七
月十七日年六十三子一人曰英女為孫元亨妻先卒
孫男二人女二周氏世有墓祠曰奉思菴在縣西大虞
浦上剏于宋紹興中至是府君亦祔焉府君之妻王氏
余從母也故為志云范陽盧熊造并書

故開邪居士楊君墓志銘

君諱誠字敬方姓楊氏其先中州人父諱榮自揚州來東吳與民數于崑山母馬氏以延祐三年八月十日生君君生裁數歲喪父癡然能自挺拔不與常兒羣甫弱冠以養親為州書佐為人狷介寡合不肯伍餘子下視之既而曰吏果不堪為也輒棄去築室婁城之南躬事田業為隱居計聚經史羣書種竹灌蔬將老焉而州縣知君方敦迫君為曹吏俾治田賦既集事即謝歸里舍一旦逮君京獄竟以洪武四年六月廿六日死于應天

府江寧縣治年五十六其子綸權厝君于聚寶門外之
笄家山其年冬十有二月甲辰歸藏崑山惠安鄉曲水
之西君娶鄒氏又娶陸氏子男三人長曰經次曰綸約
女四人長適周素次錢枕次錢寀次許嫁毛程君居家
整飭肅然有嚴君梁度君讀書惟獵取大義不事汎求
晚年尤好二程朱子書手之不忍釋以及軒岐孫吳學
皆能造其闡域自號閑邪居士既葬經謁奎為銘奎聞
居士死哀其為善而得禍言之未始不泣下今其請又

奚忍辭故為之序范陽盧熊銘之詞曰於乎楊君才猷
之楙兮胡迫于州縣亮直之槩兮胡困於罪譴匪我求
兮期自衍嗟何尤兮罹此變於乎楊君知命之達兮抑
又何怨長平殷奎著文范陽盧熊書齊郡張紳篆蓋

周伯延墓志銘

故周君諱英字伯延之墓在太虞浦東若干步伯延之
先由常州晉陵徙平江之崑山曾祖津來端平

缺

試詞賦兩為待補進士能以孝義聞于鄉祖大任元建

德路壽昌儒學教諭父允升謹恪守先業二世以醫名家而伯延之學益闳博深奧人多敬慕之洪武六年癸丑以醫局事繫府院夏六月初三日竟以疾卒明年甲寅春二月祔焉伯延之生以元至順元年庚午九月二十日得年四十有四兩娶劉氏各有一男一女男曰冕曰安定女曰某曰某其葬也冕衰經拜哭以祖母王之命俾其內弟盧熊為銘詞曰椅若人業孔茂行修飭資篤厚困獄吏非其咎竟不祿命所取捐孩兒哭慈母月

金匱山房集卷四
丁卯日癸丑大墓旁葬北首潛德存昌厥後述銘文庶
不朽

故張公墓志銘

張為吳望族居崑山者由唐禮部尚書後肩顯其孫鑑
相宗陵並載列傳宋末暨元蕭墅之張益蕃衍公諱伯
英字伯雄一諱伯庸世居蕭墅曾祖考諱某元初率民
歸附即軍前授把總祖考諱振祖隱德弗耀父名傑前
水軍府千戶妣吳氏公美風姿有器識慷慨尚節義宗

姻鄉黨有空乏者周之閭閻有罹非辜者直之有喪不
舉及流寓不能歸者賻之由是里中翕然稱為長
者然不樂仕進至正丙申薦離多故遜迹田里務農積
穀以盡俯事仰育之道乃延師教子相與講明經史又
能以人生年月日時枝幹生冲推測休咎嘗謂其宗人
曰歲在癸丑吾其殆乎果以洪武六年六月二十有三
日以疾卒于應天府之上元縣孤子倫孟骨以歸八年
乙卯九月四日辛酉葬于崑山縣泖川鄉蕭墅西原先

瑩之左公生於天曆己巳正月三日配蔣氏克勤于內
公賴焉子四長曰僖娶羅氏次即倫定婚于吳曰偉曰
侶女一人淑貞皆幼公始弱冠即以幹蠱聞田廬有加
于昔建倉鳳陽府一出私帑務以周人利物為心宜膺
壽考噫天之不可必者而遽止于斯也悲夫遂系之以
銘銘曰德積厚惠施博厥報乃食若播之不穫卒殞于
客不殞者存再世而振祚肩繩繩表華撰并書篆額

楊子經墓志銘

崑山楊氏之子曰經字子經少從予授小學讀書穎銳異于常兒其父自號閑邪居士剛嚴可憚家庭之間進退有度一言一動不敢苟且率略鄉里皆期其有成年二十餘便惟家艱能與其弟持門戶有司推擇為方石長以督責兩稅竟以罪死京師年二十有五實洪武七年八月某日也及其喪還弟綸歸葬于先塋之側嗚呼哀哉楊氏裔出弘農子經之先居揚州江都祖榮始為崑山人父諱誠尚氣豪邁即居士也子經以至正十年

庚寅六月廿四日生洪武十年丁巳三月某日葬適母
鄒氏生母陸氏妻繆氏女一人曰瑤娘嗚呼予托交居
士數十年其出處進退不蹈于流俗而父子相繼以死
豈厄于世運而致然歟將稟命修短一繫于天歟蓋不
可得而知也因系之以銘其詞曰幼學壯行志不獲騁
風霜激烈摧彼朝槿歸來故鄉靈或未泯勒銘幽泉有
涕斯殞范陽盧熊譔

錢瑞妻章氏墓志銘

處士錢伯祥甫之妻章氏德禎祖諱敬又諱俊母胡氏
德禎生延祐五年戊午四月二日年十有六歸于錢氏
崑山在宋多故家衣纓文獻為諸邑冠若開封之鄭濮
陽之張陳留之阮高平之郁皆是也錢本出郁氏房族
甚繁德禎既廟見能以禮自防舅姑妯娌宗族鄉鄰咸
稱其賢惠奉祭祀饋賓客必以身先之洪武七年甲寅
七月二十日以疾卒年五十七有子輅清修好文孫男
嘉女蓋以是年十二月十五日葬于縣治之西南郁氏

先塋之東北詞曰荷錢嫂壺職修相宗事承世休婁之
江崑之丘勒茲文識諸幽范陽盧熊撰

名蹟錄卷四

欽定四庫全書

名蹟錄卷五

明 朱珪 編

雜刻

快哉亭帖

軾頓首昨日快哉亭與數客飲至醉才歸辱簡不逮即
答為愧春生雪未計尊體起居佳勝新詩甚清刻病酒
不敢率易趁韻幸少寬限否因書見過如何如何不一
軾再拜忠玉提刑執事

拜石壇記

瑛素有石癖凡過廢園壞宅見奇峰怪石輒徘徊顧戀不忍捨去或有計求之不得者必圖寫其形似標諸草堂壁間以為几格供後至元戊寅四月下泝訪竺僧巖叟于東城之菴菴即故宋周太尉宅斷垣之外燕麥中有假山在焉遂披蓐納棘褰衣而登其上羅立諸峰已為好事者挽載而去獨有一石似壁而失其左股卧于高梧之下有老坡題識觴詠之語易之以栗歸而立之

中庭左映右帶無非松竹芭蕉枇杷之屬多有書帶草耳石之挺挺拔拔如老坡獨立于山林丘壑間愈見其孤標雅致也瑛加之拂拭永為子孫珍玩明年奎章閣鑒書博士丹丘柯敬仲下訪見而奇之再拜題名而去丹丘詞翰鑒博有元之元章也于是砌石為壇字曰拜石後三月而御史巴延達燕善來觀嘉柯之逸遂為作古篆拜石二字于壇又隸寒翠以美其所此石之名由是愈重然皆未知所紀之詳至正己未之冬周履道秀

才自梁鴻山攜贈老坡手帖讀之乃是答忠玉提刑快
哉亭飲後者上有賈秋壑私印其詞與紀石甚肖嘗記
大全集中有次王忠玉遊虎丘詩有連日與王忠玉諸
公遊西湖次韻詩有次劉景文答馬忠玉詩蓋當時有
兩忠玉焉然莫知其孰是及攷宋史元祐四年坡為翰
林學士兼知禮部以論事積當軸者恨故請外拜學士
龍圖閣知杭州以避朝諍也瑛想老坡風流曠邁行千
里間有名山勝水豈不與友朋醉酒賦詩以佐其意又

攷諸雜錄忠玉乃王規夫姪孫先坡在維揚後坡渡江
老坡答其詩有及君未渡江過我勤秉燭之句是則書
所寄者王忠玉無疑也然後知石乃維揚故物帖則王
忠玉家寶也吁石之在山不知其幾千萬年因坡之題
鑿而出山者又不知其幾百年帖之壽又非石比兵殘
火燬展轉流落入手者亦不知其幾百年今一旦二美
併來抑神物有所會合耶吾玉山有所際遇耶又思丹
丘巴延不二十年皆仙去坡仙有靈豈不能于風清月

白之夜挾二公同逍遙于此壇乎瑛亦豈不能摘古玩
酌一尊于此壇乎不因此石其能永傳敬書此記俾伯
盛朱茂才刊于他石使後之覽者知石與帖并拜石之
壇有所自來云至正丙申正月五日金粟道人顧阿瑛
書于玉山草堂

奇石銘

厥色斯蒼厥質斯剛元氣胚渾陰陽互藏有截高華倬
彼太行勿伏為虎勿起為羊說法點頭扣之庚庚大蘇

之誌海嶽之狂異世同符拜為石兄永千萬年鎮茲玉
岡河南陸友仁製

題拜石壇詩

眉山三蘇宋儒宗長公矯矯人中龍南遷僭耳西赤壁
大章光燄超洪濛快哉之亭雪初霽領客登覽山川雄
自云平生不解飲胡乃一舉觥船空和詩寬限見真率
鑿崖題石摩蒼穹功名富貴一丘土斷碑殘素傳无窮
吁嗟神物人所衛玉山合璧俄相逢奎章博士丹丘翁

江南放逐驚秋風見之即下米芾拜二顛癡絕將無同
築壇山中加愛護樹以松桂連椅桐雨窓雲戶濕寒翠
朝闌暮檻開青紅白野御史龍頭客青年獻賦蓬萊宮
戲將脫穎寫螭匾新釵折股星流虹只今烽塵暗河岳
王侯第宅皆蒿蓬牙籤玉軸映竹素好事獨傳吳顧雄
婁東朱珪鐵作畫字字玉屈蠕蠕蟲嗟哉昔人今已矣
慘淡故國風煙中如何二子復嗜古策勳墨妙收奇功
我來拜石重太息蒼蒼古雪吹長松登壇絕叫浮大白

酒酣目送飛孤鴻汝陽袁華

好事久傷無米顛清泉白石亦淒然快哉亭下坡仙友
拜到丹丘三百年拜石壇主顧阿瑛製

金粟道人小像贊

謂其有意于榮進與詠歌彈琴誦古人之書謂其濶畧
于世故與能擴先世之業昌大其門閭逍遙戶庭名聞
京都忽自逸于塵氛之外駕扁舟于五湖性印朗月身
同太虛非欲會玄覺于一致而貫通於儒者耶倪瓚造

金匱山房集卷五
戊戌八月法喜精舍北樓

儒衣僧帽道人鞋天下青山骨可埋
若說向時豪俠處五陵鞍馬洛陽街
顧阿瑛自題

爽溪樓詩

殿閣連雲接爽溪鐘聲遠與鼓聲齊
長安若問江南事報道風光在水西
右唐宣宗避地所作周伯琦為僧克
新書

戒石銘

爾俸爾祿民膏民脂下民易虐上天難欺黃山谷書崑
山州知州史文彬重立

天蓬贊

粵始天造孰形以隆範形一定天協于公維形匪形萬
有不同帝所之聖其魁曰蓬作帝良能賦此異躬部以
丁甲雷聽風從扶豎忠順剔除妖凶闢翕陽陰和合雨
風斗應喉古彗伏梧衝丹霏夾日紫氛流龍祝釐弟子
受法靈宮畀汝心印罔感不通太上弟子張天雨

發香臧宮弟子楊維禎造吳睿書

竇諫議陰德錄跋

竇諫議種德之厚既身享富壽而又獲五子俱顯之報由是觀之天道福善其可誣乎文正范公悉錄其事蓋為天下後世勸也今刻斯文以廣其傳使人人得覽而興起為善之心亦世教之一助也元統二年歲次甲戌春華陽思義識太原王時書濮陽吳睿篆額

梅谿說

梅谿者沈長卿自號也長卿因宦游自越而吳僑居甚
久不遠數百里致書于予以其自號者求予為之說頃
予起于既老承乏詞林年侵學落無能為役納祿而退
五載于茲諸公貴人莫不上體朝廷閔其衰老故令還
山之意未嘗橫加虐使邇輕薄小子偽為予文者所在
有之俗筆元知但喜其獻諛取媚而甘受其欺罔長卿
不察遂疑予尚未焚筆硯猥以此見驅役予年垂八袞
氣息奄奄安能效三五少年東塗西抹為人作春妍乎

雖然長卿之來意則已勤不可以不答也昔永嘉王公
龜齡自號梅谿王公狀元及第歷侍御史至太子詹事
為時名臣其文章事業海內之士無不斂衽心服先儒
朱子尤敬仰焉所撰梅谿集序稱其光明正大踈暢洞
達求之古人惟丞相諸葛武侯工部杜先生尚書顏文
忠公侍郎韓文公參知政事范文正公五君子可以為
之比其高風盛烈逮今二百年猶凜凜也長卿翱翔于
仕途見其進未見其止俟他日至王公地位然後挂冠

而歸從容領畧梅谿之上攬幽芳挹清流詠水部之詩
誦廣平之賦而和以武夷之樵歌彼士大夫嘖嘖誇詡
曰彼亦一梅谿此亦一梅谿王公不得專美于前矣奚
必太早計而求予之說為王謝爭墩古今佳話有為者
亦若是長卿勉之予之說止于此長卿或以為然則姑
附于卷末幸勿謂予前言戲之耳至正甲午八月朔旦
金粟山樵者黃潛撰封禺山樵吳睿書

實際川禪師影堂逸事

余觀永懷重修記所謂行人道川者玉峯狄氏子始為
縣之弓役聞東齋謙首座為道俗演法遂從之習坐因
上元郎官欲空其獄張燈縱市人遊玩以罪囚繫于狄
家狄謂囚曰汝曹欲入市觀燈乎囚喜狄悉縱之囚竟
逃去明日聞于官尉怒笞之狄于杖下大悟去依永懷
剪髮為頭陀未幾主僧遣之至江潯市木建諸天閣木
商問市木何為曰建法堂諸天閣商扣之玉峰有狄押
獄今在否狄笑曰我是也商羅拜之曰公我輩恩人也

蓋衆商昔日羣囚也商曰我當以建閣材木報公之德
一日送至公歸勿言至期狄出視寺河左右皆巨木也
閣由是而成始者建閣之意中為井闌諸天環繞其上
下安寶華玉座為住持者升堂說法以表諸天之空中
拱聽也閣成狄復依謙於東齋謙為改名曰道川且曰
汝舊呼狄三今名道川川即三也此去能豎起脊梁了
辦箇事其道如川之增若放倒依舊狄三矣川銘于心
建炎初道川遊方至天封參躡菴成禪師機鋒投合菴

印可之復因東齋道俗欽敬有以金剛般若經請問者
川為頌之今盛行于世陰興間殿撰鄭公喬年漕淮西
適無為軍治父虛席命川開法一香為踞菴供冬至上
堂云羣陰剝盡一陽生草木園林盡發萌惟有衲僧無
底盍依前盛歛又盛美川號實際加泰普燈錄載師為
僧出世因緣不載永懷建閣之事而建閣一段佳話予
聞之于覺齋王真人非妄傳也予參合普燈與王真人
所傳以為川禪師影堂逸事若入在記中詞繁文夥只

收為逸事則不失禪師建閣之功德也今岳雲望禪師
一新梵宇豈非川禪師之再來也望乃靈隱普覺獨孤
禪師之子予之猶子也至正九年己丑仲秋前玉几松
月道人正印書時年八十有二

秘閣銘

秘閣銘右軍書大舜琴一腕之力汝所任盧熊篆

簫銘

截翠蛟于渤澥吹紫鳳于崆峒起一緒之要妙宣八風

於神宮東維叟製王時篆

鏡銘

資爾融明合禮頌美與厲惟其公毋物以室无垢以蒙
嗟爾之用唯有終鄭東造吳睿書篆

拄杖銘

九節杖得之婁江之上其日己未癸丑仲夏員丘岌業
兮雲而在下噫我與爾俱變化倪璿造盧熊篆

名蹟錄卷五

欽定四庫全書

名蹟錄卷六

明 朱珪 編

附贈言

贈朱伯盛詩序

士不用于當世必有託焉而隱者雖一藝之微一事之卑皆不恥為之故往往有託于農圃巫醫商賈羣工之中蓋惟求其可以自晦而已又庸計其高卑可否而後處其地哉吳郡朱珪居婁江之旁無他嗜好獨喜周籀

秦斯篆畫之古取石鼓嶧碑之文習之既久而盡悟其
法因善為人刻印賢士大夫多就珪求刻焉珪之言曰
吾聞位高者身危祿富者憂大名盛者毀隨彼有自始
壯而仕至髮落齒脫而不知止及其遭疑忌而廢斥觸
刑辟而戮辱于是時也則雖深咎極悔已無及之矣今
吾端吾意于篆畫唯求其無部分之失旁從之謠而無
戾夫古人制作之義吾過亦寡矣若珪蓋有託焉而隱
者歟永嘉李孝光吳郡張雨作詩以貽之珪不絕于當

世賢者則其為人又可知已故予系之以序至正十四年四月昆陽鄭東書

知君用意出雕蟲自較明牕小篆工爭鑄方銅刻私印姓名僅了百年中

張雨

舞鳳蟠螭追遠古雕鏤纖妙入秋毫佩身可比玉剛卯贈汝愧無金錯刀

李孝光

子刻印如刻秋濤轉摺變化手縱操螭匾神凝李斯篆肯綮妙悟庖丁刀漢章舊制蟠龜鈕魏武新書虎豹韜

太史周南縱留滯劍文仍欲洗金膏

鄭元祐

煒煌金石刻鬱崛蛟螭文猶遺姓名在蕭然秦漢分寶

玉道幾息瑰奇散如雲朱翁業古藝千古揚清芬

雲林

生倪瓚

門前索印索如逋一榻西山對酒壺池看科斗春波活

樹養珊瑚雪影扶縱有黨碑名肯附只耽奇字手親摸

幽居巷裏時相見清比詩人骨更臞

郭翼

神斧磨天割紫雲仙葩殞玉發奇芬靈書寶訣開剛卯

不數人間小篆文

畫刻輸君總色絲前身想是伏靈芝
虎頭食肉元无相
鑄鈕休傳左顧龜

我家金粟道人章瓦款蟠螭識未央
千古典型今復見
佩之何必獸頭囊

鏤玉鍍金與錯銀盡將工巧失天真
君能獨掃雕蟲伎
定品當年合入神

伯盛朱隱君子西郊草堂之高鄰也性孤潔不佞于

世工刻畫及通字說故與交者皆文人韻士予偶得
未央故瓦頭古泥中伯盛為刻金粟道人私印因驚
其篆文與製作甚似漢印頃又以趙松雪白描桃花
馬圖鉤勒于石精妙絕世大合松雪筆法惜其不得
從遊于松雪之門使茅紹之專美于今世因題四絕
于卷末以美之伯盛勿以予言為譽後必有鑒事者
公論也至正十七年中秋日書于玉山草堂金粟道
人顧阿瑛書

朱生心似鐵篆勢藝彌精應手多盤折纖毫不重輕么
麼形獨辨蟠匾勢初呈漢印規模得秦碑出入明風流
金石在潤色簡書并餘刀庖丁解風斤郢匠成達觀應
自我賞鑒足平生趣刻無多訴因君託姓名

陳世昌

白首耽書更不忘鵠文蟲篆爛生光
高人為賦我冠石
太史曾題琢玉坊
野屐踏雲閒訪竹
春簾迎霧靜焚香
別來又泛松陵棹
渺渺輕鷗江水長

盧熊

少林心印元无文
刻雕無乃傷其真
太璞未分親見得

伯盛妙手何超倫千聖頭邊不一印猛虎插翼龍奮迅
疾蹀過風正令行不妨堪作如來肩

釋清欲

西祖傳心不以文伯盛用之心更真印空印水印泥也
左旋右轉世絕倫鍊牛之機即此印石火電光何足迅
得之于手應于心聚螢讀書笑車肩

釋智寬

方寸鐵錢逢篆

方寸鐵志

吳門朱珪氏師濮陽吳獻大小二篆習既久盡悟石鼓

嶧碑之法因景為人刻印遇茅山張外史外史錫之名
方寸鐵持以過錢塘訪予于吳山次舍求一言白其所
謂方寸鐵者予笑曰予方以鐵石心取乖于世而予又
欲乖我之乖乎雖然古之豪傑修己治人者必自方寸
鐵始黃金白璧可磨此鐵不可磨也予以是鐵印諸金
玉銀銅犀象使佩之者皆无媿于是鐵外史氏心印之
教行矣豈直無悖于篆畫无戾夫古制也哉今一妄男
子釋蹠起間巷取封侯印如斗大咫尺書駭役帶甲百

十萬如金翅鶚逐百鳥无一敢後者金印之權重矣哉
吾不知果能為天子剪狂寇佐中興為生民開太平无
愧于汝鐵不則徒以苟富貴不至腐屍滅名不已使得
珪方寸鐵印斯可以蒙金斗而壽榮名矣珪或為今將
軍刻符印其亦以是告之至正十九年秋七月八日李
黼榜同甲進士今奉訓大夫江西等處儒學提舉楊維
禎志

方寸鐵銘

婁東朱珪字伯盛工古籀篆文其于六書之義攷之尤
詳嘗以餘力刻印章則為中吳絕藝間遊錢塘遇句曲
外史張雨名之曰方寸鐵蓋以喻其能堅其志操期以
進乎道亦若桑國僑志于鐵硯之鐵云雖然科斗書廢
已久必以篆籀為師法漢隸而下不足論能復其古其
庶幾朱君乎朱君與予相游從知其志操之日堅今年
予來玉山中聆朱君之書法益有進是猶張旭悟公孫
大娘之舞劍器也見其刻玉石如切泥則又若漆園自

卷六
誇庖丁解牛而得膏肓也張得于舞劍庖丁得于解牛
吾知朱君得于書而悟外史方寸鐵之旨矣遂述其事
而為之銘銘曰聖人作人文開龍馬出榮圖來神農氏
尚結繩民勿犯俗龐淳史蒼頡肇有制譬孳乳乃曰字
越夏商歷周秦科斗廢籀篆臻漢而晉書變作唐風媮
政日惡曰逮今邈寥寥事刻畫昆吾刀鍾鼎隳石鼓頽心
太苦婁朱珪至正庚子夏四月二十六日河南陸友仁造
天地為爐陰陽為炭鑄方寸鐵非柳下鍛剛不可

屈堅不可磨侯剛侯堅利用實多全欲以之剗食月蟲
環以執諫剛過于崇惟善用者為衡為權稱物平施錙
銖勿偏嗟爾有此獨藏于密以桑之硯改而為筆搗詞
琬琰百鍊其工剔去魚魯斯文有功彼寸鐵兮人孰無
之欲偉其器緊鑪與錘寧小為錐勿大為錯凡百君子
勿由外鑠毘陵謝應芳

方寸鐵頌

緊方寸鐵婉毘吾刀游刃發矚妙契縱操六書奧旨探

金匱要略卷六
賸捐勞史籀秦斯作則孔昭翔鸞翥鳳騰龍騫蛟為印
為章奎璧麗霄天苑藝林世賴崇褒我頌匪私永言不
佻至元庚子八月十八日淮海秦約造

詩

朱君手持方寸鐵撫印能工漢篆文并剪分江龍噴月
昆刀切玉鳳窺雲他年金馬頻承詔此日雕蟲試策勳
老我八分方漫寫詩成亦足張吾軍至正辛丑八月朔
平湖草堂中寫隴右邦經

蒼頡製書觀鳥跡白日能令鬼神泣何如朱生手中一寸鐵文章刻遍山頭石山石可移心不移生精此藝將奚為生言平生苦心力過客摩挲那得知願將此鐵獻天子為國大刻磨崖碑為國大刻磨崖碑廬陵張昱

人心何危患多歧方寸之鐵貴自持百鍊耿耿明秋暉彼柔繞指惟詭隨朱盛明勁真吳兒法書鐵畫過李斯晴憲握管儼若思學成變法出愈奇鐵耕代筆猶神錐用之切玉如切泥孤忠不媿月食詩清便更賦梅花詞

元祐黨碑我所非
驢鳴犬吠吾所嗤
雕蟲小技用兒嬉
屠龍妙割嗟奚為
盛乎

缺

知不知北南車馬得得來大

書深刻磨崖碑至正二十年庚子歲夏六月初吉天台氏元鼎造

袖裏昆吾一寸鐵江南碑碣萬家文玉符金印雲臺將大篆煩君為勒勳

雲間陸居仁

十年兵興遍天下石山大火羅浮野野火燒盡秦漢碑咸陽鬼哭無人打故人吳睿業篆隸好古乃有如珪者

妙刻金粟道人章尤工白描桃花馬金印徒聞如斗大
零落當時建章瓦君不見黃鶴仙伏靈芝北海久長高
聲價武夷山樵者錢惟善題于海嘯軒

靜寄軒詩三首

靜寄軒中無垢氛研苔滋墨氣如雲匣藏數鈕秦朝印
白玉蟠螭小篆文

獨行應如魯獨居心同柳下執云迂從教隣女衣沾濕
試問高人安穩居

身似梅花樹下僧
茶烟輕颺鬢髭曾
神清又孤山鶴

瘦骨伶仃絕愛憎

雲林子

朱伯盛甫小像贊

游乎古六藝之林
業刻符而工摹印
善學魯獨居之男
子身不娶而能忍
貧飲沆瀣而為漿
友寂寞而與隣瘦
骨昂藏老鶴精神
善追蹤西塞山前
之漁寄迹桃花源
上之民者歟
辛亥十二月倪瓚書

臞然如昨秋風野鶴老矣于今孤雲遠岑軌有道之躅

不娶終身何身之卓求古人之心不刻黨碑何執之深
吁此其所以傲兀乎變化吁此其所以膏肓乎山林華
亭殷奎製

印文集考序

摹印之法六書之一也徵諸史傳其制作之大略可睹
已自唐以來人不師古私印往往繆戾至于近世極矣
大德中魯郡吾子行父因六書之學畧舉其要而人稍
趨正先生與承旨趙公又各集為印譜可謂信而有

徵也鄉人朱珪篤志于古嘗從錢塘吳睿師授書法凡
三代以來金石刻詞靡不極意規倣暇日又取宋王順
伯并吾趙二家印譜旁搜博取纂為凡例并吳睿等所
書印文及自制私印附焉名曰印文集考間以示予予
謂私印之作固書學之一事為士大夫者罕習知之而
況上窮蒼史神明之奧以通造化之原者哉宋宣和間
嘗修博古圖至于鏡鑑泉貨之文亦頗著錄然猶未采
印文也至王球嘯堂集古錄昉有之近世曹南吳忠淳

刻學古編僅存古印數十而莆田鄭晁又集印文七十餘鈕模刻傳之名曰漢印式所撰序畧无所依據繆為廣博之詞而失其要領又自以所制附後舛謬尤甚其稱唐張彥遠宋李伯時王子升近時吾子行失其本又不知何說也大槩前人志于存古所輯不能無醇疵其多者既不能廣傳而簡略者又無以考信千載之下又孰能辨某印為漢魏某印為晉唐而當時作者豈盡出于蔡中郎李少溫之流乎苟非識見之博考訂之審使

金石錄卷六
卷六
玉石錯雜涇渭混淆如鄭畧之繆者亦何益哉今朱君
所著黜其背戾存其簡約集為成書誠篤志古學而有
益于當今然蒐輯有年適值兵革頗有散佚識者恨焉
今所存若干篇釐為一卷貽諸好事俾予序首珪字伯
盛清淡寡慾五十不娶脩然有出塵之志永嘉李季和
清河張伯雨曾稽楊廉夫昆陽鄭季明咸所嘉尚云至
正廿五年乙巳秋八月朔吳郡盧熊書

印文集考跋

今世士大夫名印謂之圖書即古人私印其制吾竹房
三十五舉言之甚詳然未有關世道處如漢人以五字
為例豈無所例乎國初制度未定往往皆循宋金舊法
至大大德間館閣諸公名印皆以趙子昂為法所用諸
印皆陽文皆以小篆填郭巧拙相稱其大小繁簡儼然
自成本朝制度不與漢唐金宋相同天厯至順猶守此
法斯時天下文明士子皆相倣倣詩文書簡四方一律
可見同文氣象甲申乙酉間予在太朴危先生家始得

江右吳主一所鑄印文曰危氏太朴曰臨江危氏用于
文字之間皆是陰文不用陽款名曰漢文印章有不合
此法者謂之不知漢法不二十年天下不謀而同皆用
漢印矣甚至搜訪漢人舊印如關內侯軍司馬部曲將
印別部司馬冠軍司馬等印用于自己名字之間以為
美觀以為博古殊不知以今人而為漢人居今官而佩
漢印不祥為甚且陰文屬兵象漢舊印又皆用武之印
尤為可怪數年之後天下紛紛多事朝廷用武文士皆

出總戎被介冑縣將軍印綬不復優游文事矣右附廣
東觀餘論押瓦部所論朱伯盛好考古篆籀之學與同
郡錢翼之父子及陸友仁吳孟思盧功武講論甚博尤
善倣古名刻及士大夫勒名金石儼然三代制作氣象
予為之言此使其勢雖若緩而可以觀世道之變雲
門遺叟張紳

館閣諸公無不喜用名印雖草廬吳公所尚質樸亦所
不免惟揭丈安公絕不用其制吾竹房論著甚詳然其

所用却又不合作趙文敏有一印文曰水精宮道人在
京與李息齋袁子方同坐適用此印袁曰水精宮道人
政對瑪瑙寺行者闔座絕倒蓋息齋居慶壽也鮮于郎
中一印曰鮮于伯幾父吾子行曰可對尉遲敬德鞭滑
稽大約相同子行嘗作一小印曰好嬉子蓋吳中方言
一日魏國夫人作馬圖傳至子行處子行為題詩後倒
用此印觀者曰先生倒用了印子行曰不妨坐客莫曉
他日文敏見之罵曰箇瞎子他道倒好嬉子自太平盛

時丈人滑稽如此情懷可見今不可得矣子座主張先生仲舉在杭一印曰平臯鶴慶叟蓋用杭州三山名臨平臯亭黃鶴也古人亦有如此奇者如雲烟過眼錄載姜白石印文曰鷹揚周郊鳳儀虞廷蓋以其姓氏作隱語辛稼軒印曰六十一上人又以破其姓丈米元章書史言劉注印曰劉巨濟符符字亦好奇耳雲門山樵張紳書朱伯盛印譜後

字原表目跋

右朱珪所摹吳孟思篆書字原暨說文表目也孟思嘗
為胡膺寫說文解字一部既成且謂託熊分註其下今
書藏吳氏然猶缺其注字未完珪愛其篆法摹此五百
四十字求予小楷補綴其間因為改正譌誤珪嗜古好
學予于古今印文序言之詳矣茲得以畧武寧盧熊記
字原音訓跋

吳郡朱伯盛讐校字原音訓授其甥孫延年講習之求
予繕寫成帙其意倣郭忠恕石本凡例蓋忠恕用少溫

所修而伯盛一依說文定本其用心亦厚矣後之覽者毋以淺近而忽之南昌盧熊記

題朱伯盛所藏吳孟思書三體心經

褚河南書心經石刻所傳今亦罕得予嘗一見可謂倡人者喜況親御翰墨迹耶孟思以鍾鼎篆隸三體書心經嚴勁清潤有商周秦漢之遺法吳朱珪氏工篆字故孟思寫此以贈珪當為入石傳諸後世詎不以河南視之也嗚呼珪氏為吾寶之河東張翥書于武林史局

世間精妙之物見者莫不撫玩嗟賞何者其立心不苟則其勢久而必精物之精者擬諸造化夫孰能少之乎此卷備三體而各臻其妙非與一世周旋于法度之中不能及也吾鄉自褚河南後能書之士鮮克擅名今得吳睿篆隸自當出色前有張叔厚白描觀世音像併為二妙宜珍襲之得其卷者婁江朱伯盛氏至正辛丑重陽後一日錢塘陳世昌書于禾興水西寺之寓舍爽溪樓

右濮陽吳睿孟思所書三體心經一卷梵義弘深間不容喙所可議者古文款識見之三代鐘鼎大篆見之周石鼓秦權斤度量漢隸最廣惟蔡中郎石經深可師法後世宗尚不一務奇成怪變雅為俗無復古人渾厚氣象豈世道日趨下歟良可愍已予聞孟思先人玉溪翁好游其家故多秦漢石刻用力既久色色精詣自吾竹房趙松雪虞道園以下便為第一手毘山朱珪隱于方寸鐵蓋亦黃鶴仙伏靈芝之儔也寶藏此卷不以輕示

金剛經疏 卷六
人宜及其目力勒諸堅眠以傳好事亦盛德者之用心也金粟道人尚克相于成焉隴右邪經拜手謹書

摩訶般若波羅蜜多者梵語也此翻大智慧到彼岸心也者即一切含生本有靈覺之性也迷之則永沉凡下悟之則遽為聖賢觀自在菩薩者即能行此而悟明之人也以是而度一切苦厄者即到彼岸之時也此經流通末世書寫受持若家喻而戶曉求如吳孟思之筆端三昧則不可得矣後世閱是卷者或能因公之書而能

了悟此心如睡夢覺如蓮花開朗然凡聖悟迷之表則
孟思之書不虛設矣至正廿一年二月十五日南堂沙
門清欲拜題

予友朱君伯盛精字法悟空相故濮陽吳孟思為書三
體心經以贈前有淮海張叔厚白描觀世音像引首久
欲題識而觀其人適與予同訪了翁菴禪老伯盛出此
卷一見而了菴言下意會即拈筆一一重為指出信當
世之三絕也伯盛又欲予證明予以久交不能固辭強

于心上加一轉語製成二偈云

斬釘截鐵畫虛空三體分明一體同讀得正中無一事
蓮花開在海當中

當心一畫到如今畫畫皆心不可尋盡說朱珪精字法
看他那畫上求心金粟道人顧阿瑛焚香為說書以為
識

五蘊皆空空亦空悟迷雖異此心同當知自在能規照
不落尋常影象中

點開心畫古如今未點之先作麼尋拈起筆端小三昧
方明無相本來心奉次金粟道人韻再題南堂遺老清
欲

崑山黃應龍嗜古好學所畜奇書異傳并一時典故
與予同所好也去冬寓崑僧寺一月與應龍日相接
論因借此名蹟錄一編歲久蠹簡不敢託諸人遂手
錄之連序目五十三紙成化二十二年歲次丙午三
月廿一日小樓記吳郡朱存理性甫

名蹟錄卷六